

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

ODLUKA

**O PRIHVATANJU ZADUŽENJA PO SPORAZUMU O ZAJMU IZMEĐU
BOSNE I HERCEGOVINE I SAUDIJSKOG FONDA ZA RAZVOJ ZA
REALIZACIJU PROJEKTA „RAZVOJ INFRASTRUKTURE U
GORAŽDU“**

Sarajevo, maj 2014. godine

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09 i 44/10) Predstavnički dom Parlamenta Federacije Bosne i Hercegovine na _____ sjednici održanoj _____ godine i Dom naroda Parlamenta Federacije Bosne i Hercegovine na _____ sjednici održanoj _____ godine d o n o s i

ODLUKU

O PRIHVATANJU ZADUŽENJA PO SPORAZUMU O ZAJMU IZMEĐU BOSNE I HERCEGOVINE I SAUDIJSKOG FONDA ZA RAZVOJ ZA REALIZACIJU PROJEKTA „RAZVOJ INFRASTRUKTURE U GORAŽDU“

I.

Prihvata se zaduženje Federacije Bosne i Hercegovine (u daljem tekstu: Federacija) po Sporazumu o zajmu između Saudijskog fonda za razvoj i Bosne i Hercegovine (u daljem tekstu: BiH) u iznosu od 22.500.000,00 SR (SR – saudijski rijal), što je ekvivalent 6 miliona USD za realizaciju Projekta „Razvoj infrastrukture u Goraždu“.

II.

Sredstva zajma iz tačke I. ove Odluke koristit će se za realizaciju Projekta "Razvoj infrastrukture u Goraždu" koji se sastoji od sljedećih podprojekata:

- Sanacija sekundarne vodovodne mreže na području Općine Goražde
- Izgradnja mosta u naselju Vitkovići
- Modernizacija lokalnih i nekategorizovanih puteva i gradskih ulica

III.

Sredstva zajma iz tačke I. ove Odluke, odobravaju se Federaciji pod sljedećim uslovima:

- rok otplate.....25 godina
- grace period.....5 godina
- kamatna stopa.....2 %
- dospijeća.....polugodišnje, u jednakim otplatama glavnice
- datumi plaćanja glavnice i kamata.....30. aprila i 30. oktobra
- iz kreditnih sredstava ne mogu se plaćati carine, porezi i druge dažbine

IV.

Potvrđuje se da je razmatrana dokumentacija prihvatljiva za Federaciju, a posebno:

- Zapisnik s pregovora,
- Nacrt Sporazuma o zajmu između Saudijskog fonda za razvoj i BiH
- Nacrt supsidijarnog ugovora između BiH i Federacije BiH

V.

Sredstva zajma iz tačke I. ove Odluke Federacija će na kreditnom osnovu prenijeti na Općinu Goražde, koja je krajnji korisnik i dužnik po zajmu.

U periodu implementacije Projekta, u proračunu Federacije nije potrebno osigurati finansijska sredstva za dodatno sufinansiranje Projekta.

VI.

Zadužuje se Federalno ministarstvo finansija-Federalno ministarstvo financija da sa Općinom Goražde usaglasi i sklopi odgovarajući Podugovor o zajmu kojim će, u svrhu redovne otplate, definirati uslove vraćanja sredstava koja se prenose na kreditnom osnovu.

VII.

Daje se saglasnost za zaključivanje Supsidijarnog sporazuma između BiH i Federacije, Podugovora o zajmu između Federacije i Općine Goražde za sredstva iz tačke I. ove Odluke.

Za potpisivanje Supsidijarnog sporazuma i Podugovora o zajmu, ovlašćuje se federalni ministar finansija - federalni ministar financija.

VIII.

Za realizaciju ove Odluke i izvještavanje zadužuju se Federalno ministarstvo finansija - Federalno ministarstvo financija i Općina Goražde, svako u okviru svoje nadležnosti.

IX.

Implementacija Sporazuma iz tačke I. ove Odluke ne zahtijeva donošenje novih ili izmjenu postojećih zakona.

X.

Ova Odluka stupa na snagu narednog dana od dana objavljivanja u "Službenim novinama Federacije BiH".

O B R A Z L O Ž E N J E

Pravni osnov

Pravni osnov za donošenje ove Odluke sadržan je u članu 40. stav 4. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br.: 86/07, 24/09 i 44/10), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, broj: 44/10) u članu 40. stav 5. predviđeno je da Vlada Federacije Bosne i Hercegovine nakon prihvatanja nacrtu sporazuma o zajmu i utvrđivanja Prijedloga odluke, istu dostavlja Parlamentu Federacije BiH na usvajanje.

Razlozi za donošenje

Donošenjem ove Odluke stvara se osnov za potpisivanje Supsidijarnog sporazuma između BiH i Federacije Bosne i Hercegovine, a zatim će Federacija BiH sredstva zajma dalje proslijediti Općini Goražde kao krajnjem dužniku i korisniku zajma Projekta "Razvoj infrastrukture u Goraždu" koji se sastoji od sljedećih podprojekata:

- Sanacija sekundarne vodovodne mreže na području Općine Goražde
- Izgradnja mosta u naselju Vitkovići
- Modernizacija lokalnih i nekategorizovanih putova i gradskih ulica

Obrazloženje pojedinih tačaka

Tačka I. je nužna kako bi se prihvatio zajam koji se realizuje putem Saudijskog fonda za razvoj.

Tačkom II. potvrđuje se namjena utroška sredstava zajma.

Tačkom III. precizirani su uslovi zajma.

Tačkom IV. potvrđuje se da je dokumentacija parafirana tokom pregovora s Saudijskim fondom za razvoj prihvatljiva za Federaciju BiH, što je uslov da Bosna i Hercegovina i Saudijski fond za razvoj pristupe potpisivanju Sporazuma o zajmu.

Tačkom V. se definiše način implementacije Projekta, te da nije potrebno osigurati dodatna sredstva u budžetu Federacije za ovu namjenu.

Tačkom VI. se definiše obaveza Federalnog ministarstva finansija-Federalnog ministarstva financija da s Općinom Goražde usaglasi i sklopi odgovarajući Podugovor o zajmu.

Tačkom VII. daje se saglasnost za zaključivanje Supsidijarnog sporazuma o zajmu s Bosnom i Hercegovinom, Podugovora o zajmu između Federacije s Općinom Goražde i ovlaštenje federalnom ministru finansija - federalnom ministru financija da u ime Federacije potpiše iste.

Tačkom VIII. u okvirima nadležnosti definiše se obaveza za realizaciju Odluke i izvještavanje.

Tačkom IX. se potvrđuje da za implementaciju Sporazuma o zajmu nije potrebno donijeti nove ili izmijeniti postojeće zakone.

Tačka X. propisuje stupanje na snagu ove Odluke.